

# ጳውሎሲ ቲሴሎንቄ አሳሰ ፃፊዳ ናምዓንሉ ኪታ ጋሳ ቆፋ

ኪሪሰቶሳ ናምዓንሉ የሳ ቦላ ዳንዲዳ አይሾይ ፓላማ ሜጲሾ ቢዳ ጊሾ ቲሴሎንቄ ዋሳ ኬላን ሜቶይ ዳሪ ዳሪ ቢሰ። ጳውሎሲ ቲሴሎንቄ አሳሰ ፃፊዳ ናምዓንሉ ኪታይ፣ «ጎዳ የሳ ጋሳሳይ ማቲሰ» ያጊያ አማኖ ቲሚርቲያ ቦላ ሚንሲዲ ኦዳሰ። ጳውሎሲ ኦዲሾ፣ ኪሪሰቶሲ ያናፔ ሲንሉ፣ «ጌላ ኡራ» ጌቲቲያ ኪሪሰቶሳ ኢጻይሳ ካሌሱዋን ሃ አላሚያ ቦላ ኢታቴሉኔ ጌላቴሉ ዳሪሾ ባና ያጊዲ ኤንታ አማኑዋ ሱሪሴሰ።

ሃዋሪይ፣ ሜቶይኔ ዋዬይ ዳሪኮካ ኤንቲ ባንታ አማኑዋን ሚናናዳ ኢኔ ኢያራ ኢሲፊ ዳዔይሳቲ አሉይሳዳ፣ ኤንቲ ባንታ ዳሳሰ ኮሺያባ ዳማናው ሚኒዲ አላና ሜላ ቃሲ ሎዖ አሶ አላናው ጉዬ ጎና ሜላ ኤንታ ሚንሲዲ ዞሪሰ።

## 2 ቲሴሎንቄ ኪታ አይፊ ቆፋታ

ጌሎ ቆፋ 1:1-2

ጋላታኔ ዋሳ 1:3-12

ኪሪሰቶሳ ናምዓንሉ የሳባ አሜቲዳ ቲሚርቲ 2:1-17

አማኖ ዳሳ ዋጋ ቦላ አሜቲዳ ዞሬ 3:1-15

ኩሻ ቆፋኔ ሳሮሶ 3:16-18

1 ጳውሎሲ፣ ሲላሴይኔ ጂሞቲዮሲ ቲሴሎንቄ ዋሳ ኬላን ዳዔያ፣ ያሳ አዋባኔ ጎዳ ዬሱሰ ኪሪሰቶሳባ ጊዲዳ አሳሰ ፃፊዳ ኪታ።

2 ያሳ ኑ አዋፔኔ ጎዳ ዬሱሰ ኪሪሰቶሳፔ አቶ ኬሃቴላይኔ ሳርቴላይ ሂንቴው ጊዶ።

ኪሪሰቶሲ ያ ዋዴ ሃናና ፒርዳ

3 ኑ አሻቶ፣ ሂንቴ አማኖይኔ ሂንቴ ኢሶይ ኢሱዋኔ ሃራታ ሲቁያ ሲቆይ ዳሮ ዲጨያ ጊሾ ኑኒ ሄሳሰ ያሳ ኡባ ዋዴ ጋላታናው ቤሴሰ።

4 ሂንቴና ጋኪዳ ጎዳኒኔ ዋዬ ኡባን ጌንጫኒኔ አማኖን ሚኒዲ ኤቁዳ ጊሾ ኑኒ ኑ ሁዔን ያሳ ዋሳ ኬላታን ሂንቴባ ማርካቲሾ ሂንቴናን ጨቁቶሰ።

---

1:1 ሃ.አ 17:1

5 ሂንቴ ኢያ ጊሾ ጊዲ ሜቶ ኤኪያ ያሳ ካዎቴላሰ በሴይሳታ ጊዲዲ ታይቤታና ሜላ ያሳ ጁሎ ፒርዳስ ሃይሲ ማላ።

6 ያሳይ ቱማ ፒርዳ ፒርዳና። ያሳይ ሂንቴና ዋይሴይሳታ ቦላ ዋዬ ኤሃና።

7 ጎዳይ ዬሱሲ ባ ዋልቃማ ኪታንቸታራ፥ ታማ ላጮራ ሳሎፔ ያ ዋዴ ዋዬቲያ ሂንቴና ኑና ሸምፒሳና።

8 ቃሲ ያሳይ ባና ኤሮናይሳታኔ ኑ ጎዳ ዬሱሰ ኪሪሰቶሳ ዋንጌላስ ኪቴቶናይሳታ ፒርዳና።

9 ኤንቲ ጎዳ ሲንፋፊኔ ኢያ ቦንቹዋ ዋልቃፊ ሻኬቲዲ ሜሪና ቆዩዋን ፒርዳታና።

10 ሄ ጋላስ፥ ኢ ባይሳታኒኔ ባና ኣማኔይሳታ ኡባን ቦንቹታንዉኔ ሳቤታናው ያ ዋዴ ኑ ሂንቴው ኑዲዳ ኪታ ሂንቴ ኣማኒዳ ጊሾ ሂንቴ ኢያ ቦንቹይሳታ ጊዲኒኔ ሳቤይሳታ ጊዲን ዳና።

11 ኑኒ ሂንቴው ኡባ ዋዴ ያሳ ዋሴይ ሄሳሳ። ኑ ያሳይ ሂንቴና ጭዳ ዴዑዋስ በሴይሳታ ጊዲዲ ታይቤታና ሜላ ኑኒ ዋሶስ። ሂንቴ ሎዶባ ኣፋናው ኣሞቲያ ኣሙዋኔ ሂንቴ ኣማኖ ኑሱዋ ኢ ባ ዋልቃን ፖሎ።

12 ሄሳን ኑ ያሳኔ ኑ ጎዳ ዬሱሰ ኪሪሰቶሳ ኣጵ ከሃቴላን፥ ጎዳ ዬሱሳ ሱንፋ ሂንቴ ቦንቻና፤ ሂንቴናካ ኢ ቦንቻና።

## 2

### ጌላ ኡራ

1 ኑ ኣሻቶ፥ ኑ ጎዳ ዬሱሰ ኪሪሰቶሳ ዩሳባኔ ኑ ኢያራ ጋሄታናው ሸቃናባስ ኑ ሂንቴና ዋሶስ።

2 ቲንቢቴን ዋይኮ ሃራ ኣሳፔ ሰዒዳ ቃላን ዋይኮ ኑፔ ኤኪዳ ኪታዳ ኦሊዲ፥ «ጎዳ ጋላሳይ ጋኪስ» ጊዲ ሂንቴ ዋዛናይ ዳጋሞፎኔ ዋባቆፖ።

3 ሂንቴና ኦኒካ ኣይ ኦጌንካ ባሌላፎ። ካሴቲዲ ዉርሴላ ኡራ ጌላቴላይ ቆንጮናኔ ቆዮይ በሲያ ጌላ ኡራይ ዮና ዴሲሺን፥ ጎዳ ጋላሳይ ጋኬና።

4 ኣሲ ጎይኒያባኔ ያሳያባ ኡባ ኢ ኢፃናኔ ባና ቶቁ ኦፋና። ሃሪ ኣቶሺን፥ ያሳ ኬላ ጌሊ ኡቲዲ፥ «ታኒ ያሴ» ጋና።

5 ታኒ ሂንቴራ ዴባሽ ሂንቴው ኡዲዳይሳ ኣኬኬኬቲ?

6 ኢ ባ ጋላሳን ያናፔ ኣቲን ሃዒ ዮናዳ ኣይቢ ኢያ ቴቂያኮ ኤሬታ።

7 አሳስ ቆንጨቦና ጌላቴላ ፀራ ዋልቃይ ሃዲካ ኦሴስ፣ ሺን ሃዲ ኢያ ቴቁይሲ ዳዔስ። ኢያ ቴቁይሲ ኦጌፔ ኪቻና ጋካናው ኢ ቆንጨና።

8 ሄሳፌ ጉዬ፣ ጌላ ኡራይ ቆንጨና፣ ሺን ጎዳ ዩሱሲ ባ ዶናፔ ኬያ ሾምፑዋን ባ ቦንቾ ዩሳን ኢያ ዋቆና።

9 ጌላ ኡራይ ፃላሂያ ዋልቃን ዩዲ ዋርዶ ማላታታኔ ማላሊሲያባታ ኦላና።

10 ሄሳዳካ፣ ቆዮስ ዳዒያ አሳታ ዲማ ዲማ ጨሚያ ኢታ ኦሶን ባሌላና። ኤንቲ ቆዩዳይ አሺያ ቱማ ደሲዲ ኤኮና ኢዲዳ ገሾሳ።

11 ሄሳ ገሾ፣ ኤንቲ ዋርዶ ገዲያባ አማናና ሜላ ያሳይ ዋልቃማ ባሌሶ ኤንታ ቦላ ዩዳና።

12 ሄሲካ፣ ቱማ አማናና አሳቲ፣ ናጋራ ኦሶን ኡፋይቴሳቲ ኡባይ ፒርዳታና ሜላሳ።

**አቶቴላስ ደሬቲዳ አሳታ**

13 ጎዳይ ደሲያ ኑ አሻቶ፣ ኑኒ ያሳ ሂንቴ ገሾ ኡባ ዋዴ ጋላታናው ቤሴስ። ሂንቴ አታና ሜላ ያሳይ ጌሻ አያና ዋልቃን ሂንቴና ጌሺዳይሳኔ ሂንቴካ ቱማ አማኒዳይሳን ኢ ሂንቴና ባይራዳ ደሪስ።

14 ያሳይ፣ ኑ ሂንቴው ኦዲዳ ዋንጌላ ባጋራ ሂንቴና ጫዳይ፣ ሂንቴ ኑ ጎዳ ዩሱስ ኪሪስቶሳራ ኢሲፌ ቦንቼታናሳ።

15 ሂዛ፣ ኑ አሻቶ፣ ሚኒዲ ኤቁቴ። ኑኒ ሂንቴና ኑ ዶናን ገዲን ዋይኮ ዳብዳቢያን ገዲን ታማርሲዳ ቲሚርቲያ ኦይኪቴ።

16-17 ያሳይ ኑ አዋይ ኑና ደሴስ። ኢ ኑስ ኬሃ፤ ኢ ሜሪና ሚንሌሶኔ ሎዎ ኡፋይሳ ኑስ ኢሚስ። ሂንቴ ኡባ ዋዴ ሎዎባ ኦላናውኔ ኦዳታናው ኢ ሚንሌላና ሜላኔ ማዳና ሜላ ኑ ጎዳ ዩሱስ ኪሪስቶሳኔ ያሳ ኑ አዋ ዋሶስ።

**3**

**ኑስ ዋሲቴ**

1 ወርሴላን ኑ አሻቶ፣ ጎዳ ቃላይ ሂንቴ ገደን ኤሌሲዲ ዳልጋናዳኔ ቦንቼታናዳ ኑስ ዋሲቴ።

2 ሄሳዳካ፣ አሲ ኡባይ ቃላ ሲዒዲ አማናና ገሾ ያሳይ ጌላታፔኔ ኢታ አሳታፔ ኑና አሻና ሜላ ኑስ ዋሲቴ።

3 ሺን ጎዳይ አማኔቲዳይሳ፤ ኢ ሂንቴና ሚንሌላናኔ ፃላሄፔ ናጋና።

4 ኑኒ ሂንቴና ከቴይሳ ሃዒካ ሲንፋፊካ ሂንቴ ኦፋናይሳሰ ጎዳን ኑኒ አማኔቶሰ።

5 ጎዳይ ሂንቴ ዎዛና ያሳ ሲቁዎኮኔ ኪሪሰቶሳ ዳንዳዓኮ ካሌሉ።

**ኦሶ ቢሎና ዴባቴ**

6 ኑ አሻቶ፣ ሂንቴ ኑፔ ኤኪዳ ኪታ ካሎናይሳታፔኔ ኦሶ ቢሊያ አዛላ አማኒያ አሳታፔ ሂንቴ ሻኬታናዳ ጎዳ ዩሱሰ ኪሪሰቶሳ ሱንፋን ሂንቴና ኪቶሰ።

7 ኑዳ ሃኒዲ ዳናው ቤሴይሳ ሂንቴ፣ ሂንቴ ሁዔን ኤሬታ። ኑኒ ሂንቴራ ዴባያ ዎዴ ኦሶ ቢሊቦኮ።

8 ኑኒ ኦዴፊካ ካሊ ማላ ማሪቦኮ። ኑሰ ዳንዳዔቲዳ ማላ ቃማኔ ጋላሰ ኦሊ ደቡሪዳ ዴባዳፔ ኣቲን ኦዴሰካ ቶሆ ጊዲቦኮ።

9 ኑኒ ሃሳ ኦሊዳይ፣ ሂንቴው ለማሶ ጊዳናሳፊ ኣቲን ሂንቴፊ ማዴ ኦይቻናው ኑሰ ማቲ ቆዩና ጊዳና።

10 ኑ ሂንቴራ ዴባያ ዎዴካ፣ «ኦፋናው ኮዮና ኣሲ ኦኒካ ዎፖ» ያጊዲ ኪቲዳ።

11 ኑኒ ሃሳ ጊዳይ፣ ሂንቴ ጊዳን ኢሲ ኢሲ አዛላቲ ዴዔይሳ ሲዒዳ ጊሾሳ። ሄ አሳቲ ጌልሶናባን ጌሊዲ ሃራታ ኦሶ ቢሊሶሶናፔ ኣቲን ኣይኮካ ኦሶኮና።

12 ኑኒ ሃሳ ማላ አሳቲ ማራ ዴዎ ዳናዳኔ ባንታና ኮሺያባ ኦሊዲ ዴማናዳ ጎዳ ዩሱሰ ኪሪሰቶሳ ሱንፋን ኤንታ ኪቶሲኔ ዘሮሰ።

13 ሺን ኑ አሻቶ፣ ሎዎ ኦሶ ኦፋናው አዛሎፊቴ።

14 ሃዒ ኑኒ ሃ ዳብዳቢያን ኪቲዳ ኪታሰ ኪቴቶና ኣሲ ኦኒካ ዴባኮ ሄ ኡራ ኤሪቴ። ኢ ዩላታና ማላ ኢያፔ ሻኬቲቴ።

15 ሺን ኢያ አሻዳ ሴሪቴፔ ኣቲን ዎርኬዳ ያሎፊቴ።

**ዉርሴላ ሳርታ**

16 ሳር ኢማያ ጎዳይ፣ ባ ሁዔን ሂንቴው ኡባ ዎዴኔ ኡባ ባጋራ ሳር ኢዎ። ጎዳይ ሂንቴ ኡባራ ጊዳ።

17 ታኒ ጳዉሎሲ፣ ሃ ኪታ ታ ኩሺን ዓፋሰ። ታ ኪታ ኡባሰ ማላይ ሃይሳ፤ ታኒ ሃሳዳ ዓፋይሰ።

18 ኑ ጎዳ ዩሱሰ ኪሪሰቶሳ ኣቆ ኬሃቴላይ ሂንቴ ኡባራ ጊዳ።

**ኦራሳ ጩቂዋ ኅፋሶ**  
**New Testament in Gofa**

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

---

PDF generated using Haiola and XeLaTeX on 18 Apr 2025 from source  
files dated 29 Jan 2022

c35d6c73-3843-5482-b53e-7559d35deee5